

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 65 (1980)
Heft: 14

Artikel: P. Placi Spescha e la Val Medel
Autor: Widmer, Ambros
DOI: <https://doi.org/10.5169/seals-881825>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 06.05.2025

ETH-Bibliothek Zürich, E-Periodica, <https://www.e-periodica.ch>

P. Placi Spescha e la Val Medel

da P. Ambros Widmer

Igl emprem alpinist da Medel

Las turas ed ascensiuns enta Medel ein vegnidas cumpigliadas ord ils differents manuscrets da P. Karl Hager ell'ovra da Pieth-Hager sut il tetel: *Bergtouren und Streifzüge am Lukmanier und am St. Gotthard* (p. 290–309). Igl october 1782 ascenda P. Placi Spescha cun 30 onns il Péz Cristallina (3124m). Quei munta ina treidubla entschatta: Igl ei l'emprema ascensiun suenter haver terminau il studi da teologia a Nossadunnaun, il début alpinistic dil giuven Benedictin, igl ei l'emprema ascensiun da quei péz, che P. Placi numna Pozetta, pervia dall'alp vischina Puzetta, e tiarzo ei quei l'emprema tura aulta ch'el fa ella Val Medel. Che quella ascensiun ei stada per el in eveniment muossan ses plaids: «Den frohen Genuss, den ich auf diesem Berggipfel (Pez Cristallina) empfand, kann meine Feder nicht entwerfen; ich wünsche nur, ich bekäme oft Gelegenheit, ähnliche Bergreisen anzustellen». Quella ascensiun ei vegnida menziunada en numerusas descripziuns alpinisticas da Medel: Theobald, Derichsweiler, Caduff¹.

Probabel il medem onn ha P. Placi fatg l'emprema ascensiun dil Scopi ch'el ha pli tard ascendiu silmeins aunc duas ga. El dat ina descripziun detagliada, e per ils linguists dat el l'interessanta fuorma taliana Scopel (in mussament ch'il num deriva da 'scalpellum')². Era cheu ha P. Placi viu igl avegnir. Il Scopi ei daventaus in dils pli frequentai pézs per jasters e dumiasstis. La raschun di P. Placi sez: «Sche zatgi vul contemplar enina la cruna dellas pli aultas muntognas dellas alps, quei ei dal Mont Blanc agl Ortler el Tirol, dal Tödi al Pez Valrein, cussegliel jeu ad el da muntar il Scopi sper il cuolm Lucmagn»³. P. Placi ha ascendiu il Muraun ed ha

¹ G. Theobald, *Das Bündner Oberland oder der Vorderrhein mit seinen Seitentälern*, Chur 1861, p. 104;

W. Derichsweiler, *Führer durch das Medelsergebirge*, Frauenfeld 1910, p. 25; Christian Caduff, *Clubführer des Schweizer Alpenclubs, Bündner Alpen*, II. Bd. *Bündner Oberland und Rheinwaldgebiet*, 2. Auflage 1949/51, p. 123 (cun exacta indicaziun differenziada Péz Cristallina – Péz Pozata);

P. Iso Müller, *Placidus Spescha 1752–1833*, p. 10;

Gion Deplazes, *Pater Placidus a Spescha als Alpinist*, Bündner Jahrbuch 1966, p. 34–38

² Pieth-Hager, p. 243–296

³ Il Glogn 7 (1933), p. 97

explorau sin pliras turas la cuntrada della Val Cadlins. Sco deturs alpins ein renomai: Per celebrar messa ils 15 d'uoost sil Lucmagn pren el la via sur Tschamut e la Val Maighels. Ins sa probabel distinguer denter duas periodas d'exploraziuns alpinas da Medel, ina avon ed ina suenter l'invasiun franzosa. – Per undrar igl emprem alpinist medelin ha inschignier W. Derichsweiler proponiu da dar al Péz denter Péz Cristallina e la Siala, quei vul dir alla pli aulta tschema dellas Crunas sisu la Puzsetta, il num Péz Placi a Spescha. Il geolog turitges prof. Heini ha proponiu la fuorma scursanida *Pez Spescha*, mo il Cudisch dils Nums retics (RN I, 10) porta puspei il num *Pez Placidus a Spescha*.

Ulteriuras informaziuns davart la Val Medel

P. Placi ha observau e nudau si tut, mo las remarclas davart la Val Medel ein spatitschadas tscheu e leu.

El rapporta dalla lavina ch'ei sederschida ils 12 da december 1808 dallas Fontenatschas denter Pardi e Fuorns sur l'acla da Catinauns, destruend 12 nuegls e 3 tegias, mazzond 16 tocs biestga e 33 tiers manedels⁴. – El persequitescha la carschen dils glatschers da Medel igl onn 1818: «Avon circa 20 onns sundel jeu staus sils Murauns denter Val Medel e Val Sumvitg. Pastg e flurs carschevan da lezzas uras sin el. Dapi plirs onns ein els cuvretgs cun neiv. Treis gadas hai jeu visitau il Scopi ed anflau quel terreins. – Cun caschun d'ina quarta ascensiun avon treis onns era el cuvretgs cun in clafter neiv. – Varga 30 onns observel jeu ils glatschers da Puzsetta e Garriel ella Val Medel e veseivels dalla claustra ano. Els ein carschi en grossezia e lunghezia».

El observa era il tschessar dils uauls: «Era sil Lucmagn, meridiunal dil Rein-miez, era pli baul in grond uaul (Lucmagn = lucus magnus). Ozildi anfl'ins en quels loghens nuot auter ch'enqual pégn, larischi, schiember ni tieu malcarschiu»⁵. –

Nus vein gia menziunau co P. Placi anfla ella Val Medel cristallas e minerals. Ella brev a Jakob Samuel Wyttenbach, Berna, dils 19 da november 1791 numna el 12 sorts da minerals e cristallas ord la Val Medel⁶. – Entusiasmaus dalla situaziun ideala dil hospezi dal Lucmagn: posiziun centrala, tgunsch ascensibla, bialas spassegiadas en tuttas direcziuns,

⁴ Pieth-Hager, P. Placidus a Spescha, Bern 1913, p. 434

⁵ G. B. Berther, Il clima dellas alps alla fin dil 18avel ed all'entschatta dil 19avel tschentaner, scret da P. Placi a Spescha 1818, Il Glogn 1933, p. 105 ss.

⁶ Pieth-Hager, p. 452–53

proviantaziun purila, propona nies alpinist medelin d'ereger leu ina casa da vacanzas per ils erudits ed alpinists, nua ch'els savessen recuvrar lur forzas corporalas⁷.

Ellas alps medelinas viveva in pievel denter il pievel. Quei ein ils pasturs bergamascs, che vegnevan cun lur nuorsas ella Val Medel. P. Placidus sa buca ludar avunda lur luvrusadad, recliadad e schubradad. Els ein excellents guides da muntogna, e senza in pigrer bergamasc vess Spescha mai ascendiu il Pez Valrein⁸. P. Plazi menziunescha fatgs ord la historia medelina. Per promover la devoziun tier Nossadunna hagi igl Avat Jakob Bundi envidau ils habitonts da Luorscha (Olivone) da serender en processiun sil Lucmagn ils 15 d'uost. Tut quels che vegnan, survegnan ina sauma da vin e la suprastonza da Luorscha in gentar. Quella processiun ha giu liug l'emprema ga igl onn 1606⁹.

Mo ei deva era dispetas denter Avat e Medel. Ils Medelins levon buca pli dar ils tscheins per il bein de Mirias (Miralas) sut Curaglia che udeva alla claustra, ed Avat Bernard Frank da Frankenberg (1743-1764) ha stuiu far process e far appel alla Dertgira da Trun¹⁰. – Sut igl Avat Joannes Ussenpost ei Medel (la pleiv) vegnida separada igl onn 1456 dalla pleiv da S. Gions a Mustér, perquei ch'il viadi da Curaglia e Mutschnengia tochen a Mustér era stentus¹¹. Interessanta ei la remarca, che l'economia u l'administraziun communal da Medel era organisada tuttina sco a Breil¹².

P. Placidus explorescha buca mo la pezza medelina, el muossa era sias bellezias als artists. Igl onn 1817 meina el il pictur turitges Johann Ludwig Bleuler (1792-1850) tras nossa cuntrada. Quel malegia il Pass dil Lucmagn e la biala pictura da Mompé Medel cul Pez Pazzola¹³.

Per la fin presentein nus P. Placidus sco guid turistic dalla Val Medel. Per errur eran treis miedis vegni igl onn 1787 enta Medel enstagl a Medel al Rein posteriur. P. Placidus meina ils viandonts anavos e fa cun els l'emprema ascensiun dil Pez Valrein¹⁴. E tgei bien menader eis el staus

⁷ Pieth-Hager, p. 297 ss: Plan von P. Placidus a Spescha, auf dem Lukmanier ein Erholungs- und Alpenklubistenheim zu gründen.

⁸ Pieth-Hager, p. 291–293

⁹ Pieth-Hager, p. 40

¹⁰ Pieth-Hager, p. 62

¹¹ Pieth-Hager, p. 17

¹² Pieth-Hager, p. 148

¹³ P. Iso Müller, Disentis im Spiegel der Reiseberichte des 18. Jh., «Disentis» XI. Jhrg. (1944) 4. Heft p. 96

¹⁴ P. Iso Müller, Pater Placidus Spescha 1752–1833, «Disentis» 1974, p. 12

per spassegiadas sil Lucmagn! Ils numerus muossavias per turas che nus vesein oz sil Lucmagn han per origin P. Placi che ha descret detagliada-mein las spassegiadas ch'il turist u curant sa far dal hospezi anora en tut las direcziuns¹⁵.

¹⁵ Pieth-Hager, p. 299–300